

Visoki predstavnik ukinuo zabranu vršenja javne funkcije za sedam osoba

Visoki predstavnik Christian Schwarz-Schilling jučer je ukinuo zabranu vršenja javne funkcije za sedam osoba koje su raniji visoki predstavnici smijenili zbog opstruiranja provedbe mira.

Ove osobe su Edhem Bičakčić, Kemal Brodlija, Enes Čengić, Ramiz Džaferović, Elvedin Hrelja, Miloš Krstić i Kemal Terzić.

Ukidanje zabrana za ove osobe ne znači da se oni vraćaju na funkcije sa kojih su smijenjeni.

Omogućiti nekome da se vrati u javni život ne znači da će oni to zaista i učiniti.

“Ukidanje zabrane koju je izrekao OHR ne znači da određena osoba automatski može u potpunosti učestvovati u javnom životu,” rekao je visoki predstavnik. “To ustvari znači da nije više obaveza OHR-a da odluči da li ta osoba može učestvovati u javnom životu ili ne.”

Političke stranke moraju same odlučiti da li će ove osobe predložiti za funkcije u stranci, kandidate na izborima, funkcije u organima vlasti ili imenovane dužnosti. A institucije moraju, u skladu sa zakonom, odlučiti da li će ih imenovati.

Ukoliko se te osobe nađu na stranačkim listama, na biračkom tijelu je da odluči da li su to najbolji ljudi da odlučuju o budućnosti BiH.

Smjene su igrale važnu ulogu kada je BiH trebalo pomoći da posljedice rata ostavi iza sebe. Generalni je stav – između ostalih i Venecijanske komisije – da su smjene zvaničnika koji su opstruirali procese pomogle provedbi mira.

No, ispunjavanje daytonskih obaveza BiH i njen napredak ka euroatlanskim integracijama predstavljaju uvjerljive razloge za ukidanje ovih zabrana.

Pitanje smijenjenih zvaničnika mora se razmotriti sada i riješiti prije zatvaranja OHR-a.

Već 21. marta ove godine visoki predstavnik je održao konferenciju za štampu na kojoj je objasnio zašto se pitanje smijenjenih zvaničnika mora riješiti prije zatvaranja OHR-a.

Tom prilikom, visoki predstavnik je rekao: "Da bi se provela tranzicija, i organi BiH i međunarodna zajednica moraju već sada početi da se pripremaju za nju."

"Među pitanjima koja se moraju riješiti nalazi se i pravni status zvaničnika koji su odlukom visokog predstavnika smijenjeni sa funkcija zbog opstruiranja provedbe mira," rekao je.

Ukidanje odluka o smjeni ni na koji način ne dovodi u pitanje eventualne sudske procese koji se vode protiv takvih osoba.

Visoki predstavnik je podsjetio zvaničnike koji su smijenjeni odlukom ove institucije, sa izuzetkom onih koji su smijenjeni zbog nesaradnje sa haškim tribunalom, da se pisanim putem mogu obratiti OHR-u sa zahtjevom da im se izrečena zabrana ukine.

To se ne odnosi na smjene povezane sa haškim tribunalom. Oni su zasebna kategorija jer je saradnja sa haškim tribunalom jedna od fundamentalnih obaveza iz Daytonskog sporazuma.